

## বঙ্গবন্ধু বিশ্ববিদ্যালয় শামিয়ানা টানিয়ে ভর্তি পরীক্ষা!

প্রকাশ : ০৩ নভেম্বর ২০১৯, ০০:০০ | প্রিন্ট সংস্করণ



বশেমুরবিপ্রবি : কক্ষ সংকটের কারণে অনেক পরীক্ষার্থীকেই এভাবে বাইরে শামিয়ানার নিচে পরীক্ষা দিতে হয়েছে – ইত্তেফাক

রায়হানুল ইসলাম সৈকত,  
বশেমুরবিপ্রবি সংবাদদাতা

গোপালগঞ্জের বঙ্গবন্ধু শেখ মুজিবুর রহমান বিজ্ঞান ও প্রযুক্তি বিশ্ববিদ্যালয়ের (বশেমুরবিপ্রবি) ভর্তি পরীক্ষা নেওয়া হচ্ছে শামিয়ানা টানিয়ে, কখনো খোলা আকাশের নিচে। দূর-দূরান্ত থেকে অভিভাবকেরা এসে পড়েছেন নানা ভোগান্তিতে।

বিশ্ববিদ্যালয়ে চলতি বছরের প্রথম দুই দিনের অনুষ্ঠিত ভর্তি পরীক্ষায় এমন চিত্র লক্ষ করা যায়। ক্লাসরুম সংকটের কারণে শিক্ষার্থীদের গ্যারেজে, তাঁবুর নিচে কিংবা খোলা

আকাশের নিচে বসে পরীক্ষা দিতে হচ্ছে।

বিশ্ববিদ্যালয়টিতে ২০১৪-১৫ শিক্ষাবর্ষে কোটাসহ আসন সংখ্যা ছিল প্রায় ৪৫০টি, যা বর্তমানে ৩ হাজারের ওপরে দাঁড়িয়েছে। ফলে গত পাঁচ বছরে শিক্ষার্থীর সংখ্যা ১ হাজার ২০০ থেকে বেড়ে দাঁড়িয়েছে ১২ হাজারে।

নেত্রকোনা থেকে মেয়েকে সঙ্গে নিয়ে এসেছেন মিরন সাহা নামের এক অভিভাবক। তিনি বলেন, আমরা অনেক দূর থেকে এসেছি। মেয়েকে কোনোভাবে হলে রেখেছি। কিন্তু আমি কোথাও থাকার জায়গা পাইনি। রাতে বাসের নিচে পত্রিকা পেতে ঘুমিয়েছি। তবে মেয়েকে একটু নিরাপদে রাখতে পেরে ভালো লাগছে। আমি ছাড়া এরকম আরো অনেকে বাসের নিচে ঘুমিয়েছে। তাছাড়া হোটেলগুলোতে খুবই নিম্নমানের খাবার আর দামও অনেক বেশি, নেই পর্যাপ্ত পরিবহন।

বিশ্ববিদ্যালয়ের ভর্তি পরীক্ষা কমিটির সদস্যসচিব মোহাম্মদ আশিকুজ্জামান ভূঁইয়া বলেন, ভর্তি পরীক্ষার স্বচ্ছতা নিশ্চিত করতে আমরা সর্বোচ্চ সংখ্যক শিক্ষার্থীর পরীক্ষা ক্যাম্পাসে নেওয়ার ব্যবস্থা করি।

ইত্তেফাক গ্রুপ অব পাবলিকেশন্স লিঃ-এর পক্ষে তারিন হোসেন কর্তৃক ৪০, কাওরান বাজার, ঢাকা-১২১৫ থেকে প্রকাশিত ও মুহিবুল আহসান কর্তৃক নিউ নেশন প্রিন্টিং প্রেস, কাজলারপাড়, ডেমরা রোড, ঢাকা-১২০২ থেকে মুদ্রিত।

